

陶雲汀先生奏疏

奏疏卷四十九目錄

江督稿

安化陶

審明逞克強搶各匪犯定擬摺子

請鼓勵緝捕得力各員弁摺片

回省察看沿途情形摺片

奏叅員黃延榮稟訐南贛張鎮審擬摺子

覆奏挈獲匪徒鄒姓兄弟等飭審摺片

奏濱江沿湖田地被淹現飭勘辦摺片

奏壽春鎮患病開缺委長副將署理摺子

安撫會稿

奏揀員陞署泗州營都司摺子

安撫會稿

覆奏體察州縣督銷鹽引情形摺子

奏淮南加帶殘引因水患未能帶銷請停止摺  
子

議鹽務銷引緝私官員分別勸懲摺片

審明逞兇強搶各匪犯定擬摺子

奏爲挈獲湖河一帶逞兇強搶各匪犯

辦理以靖地方仰祈

聖鑒事竊照上下兩江及東豫等省交界之淮海徐  
泗等府州民情強悍搶劫兇殺之案層見疊出  
該匪徒等尤以洪澤一湖接連河淮廣濶易於  
藏匿此挈彼竄出沒爲匪大爲地方及商旅之  
害經臣選派文武員弁會同各州縣營隨時挈  
獲懲辦前據報獲強搶良家婦女脫逃多年之  
傍匪郭三銀及強搶米鹽船隻之馬八沙四等

犯解審前來當經附片奏

聞在案茲復飭據該委員等同清河縣具報獲犯或  
三四人或五六人起數甚多案情不一而起獲  
火鎗竹桿鎗及刀械等件亦復不少廬鳳道周  
天爵督率鳳泗等屬之定遠盱眙各縣亦屢報  
獲犯其已解到各犯卽飭淮揚道督縣及委員  
等晝夜研鞫或關係姦情命案或尙須獲犯質  
訊分別畱監及發回嚴辦所有獲到之郭三銀  
馬沅等犯據淮揚道督率清河縣等審明定擬  
就近解勘前來臣卽督同該道提犯親訊緣馬

沉卽馬八沙可興馬四沙中遠卽沙四馬平正  
馬迎春卽馬銀馬漢係山東濮州荷澤定陶等  
州縣回民海光亮卽海力兒蔣佃平蔣元兒鎖  
周鎖文明卽鎖大八蔣六馬玉成卽馬銀兒蔣  
拉兒鎖文亮卽鎖小八係安徽亳州回民郭三  
銀卽戈三銀係山東鉅野縣民人徐三貴係山  
東曹縣民人倪藝才卽倪五十子王兆清卽王  
四係安徽泗州民人鮑太係江蘇清河縣民人  
馬沅郭三銀徐三貴海光亮蔣佃平沙可興馬  
四向在清河訛詐爲匪併販賣私鹽已革地保

鮑太知情包庇歷年得受海光亮蔭佃平規費  
錢文不記贓數沙中遠蔣元兒鎖周鎖文明蔣  
六馬迎春馬王成亦各販私爲業每次或三五  
百斤不等其餘各犯俱無常業道光十年正月  
初九日郭三銀在海州響水口地方因知老陶  
張氏有姪女戈張氏張小招子在彼竄姦起意  
強搶勒贖卽于是夜糾約已獲擬結之胡鐵頭  
郭二麻及在逃之王三麻子王來林劉四川吳  
小猴子一共七人郭三銀郭二麻攜帶柳棍前  
至陶張氏門首郭三銀推門進內將戈張氏張

小招子拉出胡鐵頭等幫同架拉行走戈張氏等不依哭喊適該州州判尹延試巡夜至彼聞喊趕捕將戈張氏等追脫郭三銀等逃逸因未詐得錢文心仍未服復令在逃之劉克玉焦老煥往向陶張氏詐得錢十五千文花用又是年六月十四日郭三銀在安東縣地方見有孀婦張沈氏母女少艾復起意強搶嫁賣當卽強邀已獲擬結之王老虎卽王小虎兒及現獲之徐三貴在逃之劉四川卽劉三川郭大得郭三得郭八周以明謝四王三五子一共十人各攜刀



棍童夜赴張沈氏門首郭三銀踢門進內將張  
沈氏母女拉出抱置驢上竝將張沈氏幼子張  
小年一併拉走至清河縣彭家馬頭地方將張  
沈氏母女賣與懷慶府孟縣人魏立德豆船上  
得錢八十千文俵分各散張小年乘空逃回十  
三年二月初一日中午馬沅在桃源縣湖灘見  
有不知姓名米船停泊因貧難度起意搶奪隨  
糾允在逃之沙三玉兒高小郭三一共四人各  
帶刀棍筐擔前往米船走至中艙事主船戶畏  
懼躲避馬沅等搶得米四石挑回分食是月初

八日馬沅在清河縣馬頭鎮湖邊見有海州監生劉景茂票鹽船隻在彼停泊馬沅復起意搶奪隨糾允現獲之沙可與倪藝才馬四及在逃之馬九馬雙墜兒卽馬三柱馬金貴馬在田馬二卽老劉沙現卽沙善沙江捻兒沙安一其計二人馬沅攜帶腰刀沙可與倪藝才馬四洛帶木棍馬金貴馬在田攜帶火槍其餘各犯或帶竹桿長槍或帶鐵叉撲刀雇坐不知姓名划船兩隻於是日下晚時候盪至劉景茂船邊馬金貴馬在田各先點放火槍助勢馬沅倪藝才馬

在田馬二沙現跳過劉景茂船注劉景茂雇工  
錢六子上前攔阻馬沅等各執刃棍趕向拒毆  
錢六子畏懼急忙避入後艙致撞傷額顛馬沅  
等當搶得鹽三百十八包遞交沙可興等分裝  
划船盪至湖中賣與在逃之劉向姑卽牛尙谷  
船上得錢二百千文俵分花用又三月十五日  
已淹斃之楊洪在清河縣馬頭鎮見有山陽縣  
監生金振聲販運票鹽船隻自鎮開行起意搶  
奪當卽糾約海光亮蔣佃平蔣元兒鎖周鎖文  
明及在逃之楊訓魁卽楊三楊訓和卽楊三蔣

抓兒蔣言羅魁滿來王玉貴卽王二党玉魁人  
夥海光亮等允從適鎖文明之弟鎖文亮蔣抓  
兒之弟蔣拉兒先後走至楊洪俱令隨同服役  
一其十六人海力兒攜帶火槍兩桿蔣佃平攜  
帶腰刀蔣元兒鎖周鎖文明各帶木棍其餘各  
犯俱各攜帶刀槍叉棍鎖文亮蔣拉兒徒手雇  
坐陳姓劉姓划船三隻中午時候行至山清莊  
三縣交界之十三堡湖面追及金振聲船隻將  
划船靠攏海力兒連放火槍助勢楊洪蔣佃平  
鎖周跳過金振聲船上船戶徐德幅上前攔阻

蔣佃平用刀背將徐德幅打傷各犯搶得鹽一  
百一包並銀錢衣物遞交海力兒等分裝剎船  
盪至僻處將鹽零星賣與不知姓名人得錢七  
十餘千文俵分花用鎖文亮蔣拉兒各分得錢  
一千文其餘銀錢衣物俱係楊洪存留是日馬  
沅適在湖內擊見楊洪等搶奪金振聲鹽勦亦  
起意強搶隨至清河新隄地方糾約沙可興倪  
藝才沙中遠及在逃之馬尤馬雙墜兒卽馬三  
柱馬在田馬二卽老劉沙現卽沙善沙江捻兒  
沙三入夥沙可興等允從一其十一人馬沅携

帶火槍沙可與倪藝才沙中遠攜帶木棍其餘各犯俱各攜帶刀棍雇坐王五及不知姓名人划船兩隻王兆清卽王四在船爲各犯服役至午時候盪至十三堡湖面追及金振聲船隻將船靠攏馬沅先放火搶助勢一面與倪藝才馬二馬在田沙現過船船戶工人等均各畏避馮沅等當搶得鹽一百五十包分裝划船盪至湖中賣與劉向姑卽牛尙谷船上得錢一百四十七千依分花用王兆清分得錢六百文現獲之馬漢向劉向姑買鹽三百觔轉賣一次又四月

二十二日早有在逃之高小在桃源縣砂尖嘴湖邊見有劉姓米船停泊起意搶奪糾允馬四及在逃之郭三沙三馬大田沙二馬甲兒沙現一共八人高小攜帶木桿郭三攜帶竹桿長槍沙三攜帶小刀餘俱徒手雇坐王姓船隻盪至劉姓船邊高小馬四郭三沙三馬大田上船搶得米八石盪至僻處陸續賣與不知姓名人得錢十六千文俵分各散又馬平正一犯與現獲之馬沅等犯多係熟識該犯現在清江沿河一帶與傅宗凌江俊張廷林爲糧船僱覓短絳名

爲批溜子每船勒索錢三五百文不等各幫下  
舵人等畏其兇橫每年僱覓短絳均係該犯經  
手此各犯歷次搶詐之原委也反覆推鞠矢口  
不移查例載搶奪財物如有聚至十人以上執  
持器械倚強肆掠兇暴衆著者照糧船水手之  
例分別首從定擬又糧船水手夥衆十人以上  
執持器械搶奪爲首照強盜律治罪爲從減一等  
等又律載強盜已行而但得財者斬又例載聚  
衆夥謀於素無瓜葛之家入室搶奪婦女一經  
搶獲出門卽屬已成審實不分得財與未得財



爲首者斬立決爲從者皆絞監候又回民搶奪  
結夥在三人以上不分首從俱實發雲貴兩廣  
極邊烟瘴充軍又地保勾通養豢竊賊坐地分  
贓者實發雲貴兩廣極邊烟瘴充軍又糧船雇  
覓短絳如有棍徒勒價聚衆攢毆等事審實將  
爲首之犯問發近邊充軍餘俱杖一百枷號兩  
個月於河岸示衆又律載販無引私鹽者杖一  
百徒三年又販賣私鹽數至三百斤以上不將  
賣鹽人姓名據實供出者即將該犯於應得本  
罪上加一等定擬各等語此案馬沅膽敢攜帶

刀鎗器械疊次糾衆十餘人於洪澤湖內公然  
白晝搶奪商船實屬目無法紀馬沅卽馬八除  
起意搶奪米船計贓輕罪不議外合依搶奪十  
人以上執持器械倚強肆掠兇暴衆著者照糧  
船水手之例定擬糧船水手夥衆搶奪爲首照  
強盜律治罪強盜已行而但得財者斬律擬斬  
立決郭三銀黑夜糾衆持械強搶良婦張沈氏  
母女已成殊屬藐法郭三銀卽戈三銀除起意  
強搶犯姦之戈張氏等輕罪不議外合依聚衆  
夥謀於素無瓜葛之家人室搶奪婦女已成爲

首例擬斬立決該二犯盤踞清河一帶地方以  
訛詐販私爲生且馬沅疊次糾衆強搶膽敢攜  
帶火鎗兇器尤非尋常強搶可比郭三銀糾衆  
強搶良家婦女均屬情兇勢惡現當整飭之際  
該二犯兇暴衆著郭三銀又脫逃多年未便稍  
事稽誅臣於審明後卽恭請

王命飭委淮揚道王貽象河標中軍副將秦攀萼將

殊

必當如是必辦

馬沅郭三銀綁赴市曹正法仍傳首犯事地方  
示衆以昭炯戒徐三貴聽糾搶賣張沈氏等已  
成合依聚衆夥謀搶奪婦女已成爲從絞監候

例擬絞監候該犯現供另有行竊吳江縣客民銀物之案應飭吳江縣查明歸案擬結海光亮卽海力兒蔣佃平沙可興馬四積慣訛詐爲匪竝興販私鹽現復聽糾搶奪商船或施放火鎗或拒毆事主或聽糾兩次均屬怙惡未便容留內地應於回民搶奪結夥三人以上不分首從俱實發雲貴兩廣極邊烟瘴充軍例上從重發往新疆給官兵爲奴仍迴避回疆附近地方沙中遠卽沙四蔣元兒鎖周鎖文明卽鎖大丞各止零星販私數次現復聽糾搶奪商船一次均

應照回民搶奪結夥三人以上本例實發雲貴  
兩廣極邊烟瘴充軍倪藝才卽倪五十子係屬  
民人聽糾強搶兩次應於糧船水手夥衆搶奪  
爲從擬流罪上加一等發附近充軍海光亮等  
均面刺搶奪二字鮑太充當地保多年於道光  
九年誤公革退該犯明知海光亮蔣佃平積慣  
販私得規包庇已非一次與參賊分贓無異鮑  
太應比照地保參賊坐地分贓例實發雲貴兩  
廣極邊烟瘴充軍馬平正歷年爲糧船雇覓短  
絳每船勒索錢數百文實屬爲害弁丁馬平正

合依糧船水手雇覓短絳如有棍徒勒價攢毆等事爲首問發近邊充軍例發近邊充軍以上軍罪各犯到配均杖一百折責四十板海光亮馬四鮑太據供親老丁單應不准其查辦蔣六馬玉成卽馬銀兒馬迎春卽馬銀各自販私數次每次三五百觔不等不將鹽觔買自何處據實供明均應照販賣私鹽數至三百觔以上不將賣鹽人姓名供出於應得本罪上加一等定擬例應於犯無引私鹽滿徒罪上加一等杖一百流二千里鎖文亮卽鎖小八蔣拉兒王兆清

卽王四素未販私楊洪等搶奪票鹽該犯等在船服役分得錢文查例無聚衆搶奪案內在船爲匪服役之犯作何治罪明文應於爲從之馬四等軍罪上量減一等杖一百徒三年馬漢向在逃之劉向姑買得無票私鹽三百勸轉賣圖利合依犯無引私鹽杖一百徒三年律杖一百徒三年與蔣六等均到配折責安置傅宗菱江俊張廷林聽從馬平正勒索糧船僱覓短絳錢文應照爲從杖一百柳號兩個月例杖一百折責四十板柳號兩個月於河岸示衆各犯訊無

同居父兄其失察各犯爲匪之牌保查傳到案  
照例責革未獲之楊洪現據鎖周等供稱四月  
初九日在鳳陽定遠兩縣交界河內淹斃應飭  
該縣等查明取結照例詳咨逸犯馬九等嚴緝  
務獲另結起獲火鎗二桿訊據海力兒供稱買  
自在逃之壽州人陶長清應俟緝獲陶長清寃  
明來歷另行辦理未獲各贓照估追賠除將全  
案供招咨部查覆外所有審明定擬緣由理合  
恭摺具

奏伏乞



皇上聖鑒勅部覈覆施行謹

奏

道光十三年六月二十八日具

奏八月初一日奉到

硃批刑部議奏欽此

請鼓勵緝捕得力各員弁摺片

再緝捕匪徒除暴安良爲地方第一大端而偵誘堯圍卽策畧存焉擒拏捉捕卽膽力見焉臣每以此試看武弁之能事遇有拔補必查其勞績頻年以來濱江臨海拏獲匪徒不下百數十起節經分別

奏咨在案此次搜緝各匪該委員等會同各州縣經歷洪湖衝風破浪有犯必獲如清河縣知縣王國佐豐縣縣丞署清河縣張建勳盱眙縣知縣縣余君壽各在本境獲犯張建勳竝又協獲郭

三銀卽戈三銀余君壽首獲馬八卽馬沅均係鄰境斬尖重犯暨委員候補知縣王澄泗州州判葛重光鳳陽縣丞張宜尊均各獲犯經臣存記俟續有出力再行請獎外所有獲犯多名之河標把總黃永清候補從九品孫豐尤屬勇往出力高資營把總劉長清勞績更多查劉長清前於鹽匪黃玉林正法後有蔣四長子續出糾合梟私爲害經該弁偵探潛匿處所砍開船蓬首先跳上船艙蔣四長子情急投江該弁亦卽跳水將蔣四長子擒獲經臣

奏奉

諭旨將該弁劉長清以把總拔補迨後蔣四長子問擬發遣中路逃回仍在儀徵糾匪販私又經該弁前往設計生擒到案按律懲辦旋又挈獲梟匪蕭明朝王有道散雲彪散金彪等二十餘名又獲梟犯蔣仁繼等暨楊四老虎等多名均有刀鎗兇械此外所挈匪犯尚有數十起分別懲辦該弁遇事勇往有膽有識謀勇兼資實係緝捕得力武營中不可多得之員相應據實

奏明請

旨將高資內河水師營把總劉長清以內河水師守  
備遇缺卽行拔補河標把總黃永清以千總拔  
補候補從九品孫豐俟補缺後以應陞之缺陞  
用俾昭激勵至河標中營舊城汛把總羅炳德  
泗州營盱眙汛把總薛源遠盱眙縣明光集外  
委黃澄清來安汛外委拱得奎緝捕均屬懈弛  
雖有隨同協獲之犯不足抵過均經臣斥革示  
儆合併附片聲明謹

奏

道光十三年六月二十八日具

奏八月初一日奉到

硃批另有旨欽此同日奉到七月十五日內閣奉

上諭陶澍奏請鼓勵緝捕得力之員弁等語江南高  
資內河水師營把總劉長清先後緝拏梟匪多名  
竝拏獲匪犯數十起緝捕甚屬出力劉長清著以  
千總拔補後再以守備拔補河標把總黃永清候  
補從九品孫豐獲犯多名均屬出力黃永清著以  
千總拔補孫豐著俟補缺後以應陞之缺陞用該  
部知道欽此

回省察看沿途情形摺片

再漕船於六月二十四日渡黃全竣

臣

於二十

五日自清江浦返糧三四日即可抵省現在經過淮揚一帶稻田彌望青蔥洪湖運河水勢平緩各壩均可不須啓放民氣欣欣咸有豐收之望長江兩岸因上游江廣水發間有淹浸日內亦漸消落可賜順序堪以上紓

塵注合併附陳謹

奏

道光十三年六月二十八日具

奏八月初一日奉到

硃批覽奏欣慰欽此



奏叅員黃廷榮稟許南贛張鎮審擬摺子

旨審明定擬仰祈

聖鑒事竊臣前

奏江西軍政案內被劾之南贛鎮標中營遊擊黃廷榮列款稟許該管總兵張佑溪一案欽奉

上諭陶澍奏軍政被劾遊擊列款稟許該管總兵請分別革職解任提訊一摺江西南贛鎮中營遊擊黃廷榮上年補行軍政叅劾降調茲列款稟許該鎮總兵張佑溪演戲乘輜十一十二兩年並未校

閱官兵徒領操賞銀兩該遊擊屢次規勸以致獲咎等情事關屬弁稟訐該管總兵虛實均應澈底根究惟該遊擊不稟揭於未劾以前至叅劾後始行具稟此風亦不可長黃廷榮著革職張佑溪著解任交陶澍提至江寧省城將所稟各情秉公逐一研訊明確據實具奏毋稍徇縱欽此當卽恭錄行司欽遵委員確查守提叅員黃廷榮及應質弁兵竝調該總兵張佑溪先後到省臣因遠駐清江催償重運漕船卽經劄委江寧藩司秉公研訊確情解候親勘去後茲據該布政使趙盛

奎錄供詳解前來 臣隨親提研鞫緣叅員黃廷榮籍隸浙江江山縣由嘉慶四年己未科武進士在侍衛上當差期滿選授廣西南寧城守營都司海陞江西南贛鎮標中營遊擊於道光九年八月抵任該叅員辦理營務始甚黽勉迨至道光十二年間諸形遲鈍節經該管總兵張佑溪訓飭未能振作適值是年十一月補行軍政卽以才力不及咨呈劾降詎該叅員於被劾降調離任後以該總兵災年演戲宴樂任所出入乘輿及十一十二兩年未經閱兵徒領操賞銀

兩屢次規勸以致獲咎等情具稟臣查該總兵張佑溪爲專闢大員有整飭戎行之責如果黃廷榮稟許各款皆係情真事確自應根究嚴懲以肅營制倘係挾嫌誣許亦應澈底訊明覈實懲辦斷不敢稍涉顛預當卽逐款研鞫如黃廷榮所許該管總兵災年民饑演戲宴樂一節據張佑溪供贛州城內經十一年大災之後民氣雖尙未復元惟至上年春間糧價漸平竝無饑民每年三月間該鎮衙門內衙神廟向皆演戲報賽一次上年三月衆兵照舊演戲因係循舊

酬神自可毋庸禁止開場後適值下雨地窪漏  
濕搬進署內演唱傍晚卽止爲衆人所目擊竝  
無宴樂及此外演戲之前此大災時節黃廷  
榮原有民饑已饑之言竝非有所專指訊之黃  
廷榮據稱當日原係兵丁演戲敬神因一經下  
雨卽搬至署內演唱疑係違例因會於總兵前  
有民饑已饑之言是以稟內敘及又所訐該管  
總兵未蓄坐騎出入乘輿一節據張佑溪供武  
職無論大小未有不蓄坐騎之理可以查訊至  
伊尋常出入原是騎馬或偶值本處天雨不能

乘騎暫時坐轎又贛南與閩粵毘連跬步皆山有萬難乘騎之處或外出適逢天雨暫用竹兜此皆例所不禁竝非常川乘輿質之黃廷榮據稱曾見該鎮公出坐轎原值天雨之時伊因僅知武職應行騎馬不知提鎮大員遇雨暫准坐轎定例是以懷疑列稟又所訐竝未校閱徒領操賞一節據張佑溪供向於鎮屬各營公費內按營分大小每年共湊解鎮署備賞銀二百兩如有多餘以補不足設有不敷自行捐廉歷來如此辦理該鎮自道光八年七月到任應行普

巡轄屬營伍是年秋操出巡所轄十八營官兵  
共賞出銀五百九十餘兩九年分閱看存城四  
營及巡閱南安等十一營官兵共賞出銀一百  
五十餘兩十年分閱看存城四營及巡閱袁州  
等十一營官兵共賞出銀一百四十餘兩十一  
年分例應普巡轄屬十八營官兵因春季分已  
經撫臣查閱是以外轄十四營稟明未經親出  
巡閱所有存城四營官兵於秋季隨時校閱向  
不奏報計賞出銀八十餘兩十二年分春季隨  
時校閱存城四營官兵又因湖南猺匪滋事酌

調外轄十四營官兵至贛閱看挑選備戰兵共  
賞出銀一百七十餘兩其秋季因督臣前赴江  
西未及親往曾經咨會撫臣臨閱是以外轄各  
營稟明未經親往黃廷榮不知底細會請巡閱  
計自到任起至十二年分止共賞出銀九百五  
十餘兩例支操賞僅止九百兩尙有不敷如果  
稍有侵吞合營弁兵豈肯默無一言訊之黃廷  
榮據稱十一十二兩年該鎮並未出巡因未知  
底細是以請閱至前項銀兩因係該鎮操賞以  
爲巡閱官兵賞用不知並未出巡查看在城官



兵亦應於此項內動用併歷係以盈補紕通融  
辦理是以因疑稟及復提該營汛弁楊雲標兵  
丁劉文浩謝泳富隔別研鞫僉供相同臣伏查  
該參員列稟各款現經澈底推訊雖皆事出有  
因竝非平空誣指惟該參員如果懷疑已久何  
以不稟揭於未劾之先而指稟於被參之後復  
向黃廷榮再三推鞠惟稱伊年甫五十餘歲正  
宜及時自劾不意於軍政被劾離任心內不甘  
憶及張佑溪前事懷疑未釋是以於呈臣夾單  
稟內約略敘入藉申苦衷不過冀邀鑒察本非

稟請究辦委非挾制妄訐希圖報復矢口不移  
查閱該參員原稟內止稱特陳三事以明獲咎  
之由竝無究辦之語供情已無遁飾應卽擬結  
此案被劾遊擊黃廷榮所訐該管南贛鎮總兵  
張佑溪演戲乘輿徒領操賞三款業經逐一研  
訊尙皆事出有因與屬員已知上司訪揭摭款  
誣訐者不同惟該參員於被劾降調之後率行  
● 列稟陳訴此風斷不可長黃廷榮係軍政降調  
應以守備選補之員先經奏叅革審應請卽行  
革職飭令回籍至南贛鎮總兵張佑溪前將黃

廷榮列入軍政實因辦事遲鈍咨呈劾降竝非  
挾嫌妄揭其被訐各款亦俱逐一究訊明確竝  
無違例營私情弊應請

旨飭令回任除錄供咨部外所有審明定擬緣由理  
合恭摺具

奏伏乞

皇上聖鑒勅部議覆施行謹

奏

道光十三年八月十九日具

奏九月二十日奉到

硃批另有旨欽此同日奉到九月初五日內閣奉

上諭陶澍奏遵旨審擬被劾遊擊列款稟許該管總  
兵一摺此案江西南贛鎮中營遊擊黃廷榮因軍  
政被劾率行稟許該管總兵張佑溪演戲乘輿徒  
領操賞三款經該督訊明雖皆事出有因惟於被  
劾降調之後列款稟訴此風斷不可長黃廷榮著  
卽革職飭令回籍南贛鎮總兵張佑溪前因黃廷  
榮辦事遲鈍列入軍政劾降竝非挾嫌妄揭其被  
許各款亦俱逐一究訊明確竝無違例營私情弊  
張佑溪著卽飭令回任該部知道欽此

覆奏拏獲匪徒鄒姓兄弟等飭審摺片

再臣承准軍機大臣字寄道光十三年六月十二日奉

上諭有人陳奏江西福建交界處所會匪橫行宜黃縣譚坊地方鄒姓兄弟二人有梁王松王名號設立天罡會新天罡會會內編有仁義禮智信字號文武生監書吏衙役多有入會者經監生鄒江文首告地方官畏不稟究上年在岱六七都地方勒索銀錢逼獻婦女鄉里懼其橫恣不敢訴告寧都州橫石地方有蕭都管與鄒姓兄弟聲氣相通時

在寧都時在福建立有真君會又曰鐵尺會又有  
食齋之徒名曰一字教與真君會朋比爲奸福建  
之永安沙縣交界地方又有土匪與江西會匪交  
通信息等語匪徒聚衆立會勾結二省肆擾閭閻  
爲害行旅地方官形同木偶所司何事著陶澍遴  
派明幹道府大員密速前往查訪據實奏聞不可  
稍存瞻徇釀成巨案該督總轄江西斷不能辭咎  
也等因欽此臣查地方匪徒設立教會名目糾黨  
橫行若不趕緊從嚴懲辦何以靖地方而肅綱  
紀當卽遴委籍隸江西德化熟悉本省情形之

署鎮江府李昭美密往嚴查去後嗣據李昭美稟沿途查訪譚坊地方土棍鄒姓兄弟爲惡有梁王松王名號該犯等慣好聚賭未聞有逼獻婦女情事已經宜黃縣會同委員將鄒姓兄弟及夥犯挈獲多名竝將寧都州之蕭都管挈獲解省審辦又據江西按察司程懷璟稟報密委署臨江府文海暨撫州府朱楚金亦有訪聞會同將鄒姓兄弟等挈獲接無不法字跡竝將蕭都管續獲到案訊無滋事結會款跡惟該匪等聲氣聯絡朋比爲奸斷不容任其避就卽當督

率嚴審一面嚴緝夥黨盡法懲治各等情前來  
臣查此案著名首犯業已拏獲鄒姓兄弟之爲  
惡業已得實全在認真確訊將如何立會設教  
聚匪橫行一一根究實在將夥黨全行弋獲從  
嚴懲創庶可期地方又安除劄飭李昭美隨同  
江西臬司及委員等確切究訊毋任稍有隱飾  
外理合將案犯已經就獲現飭委員在江西省  
隨同訊辦緣由附片覆陳伏乞

聖鑒謹

奏



道光十三年八月十九日具

奏九月二十日奉到

硃批另有旨欽此同日奉到九月初五日內閣奉

上諭陶澍奏委員挈獲立會設教要犯現飭該員在

江西省訊辦等語此案江西宜黃縣諱坊地方有

土棍鄒姓兄弟寧都州橫石地方有蕭都管與鄒

姓聲氣相通朋比爲奸勾結肆擾不法已極茲據

陶澍奏委員全行弋獲自應就近訊辦周之琦現

已陛見來京著交桂良程懷璟親提犯証緝拏夥

黨嚴訊聚匪橫行確據按律定擬具奏毋稍不實

不盡致干咎矣欽此

奏濱江沿湖田地被淹現飭勘辦摺片

再臣於六月下旬由清江浦回省目睹淮揚一帶早稻已收大江兩岸漲痕消退田禾彌望青蔥滿擬豐收可卜不意七月望後陰雨連旬低田更多積潦而上游黔蜀湖廣之水洶湧東趨江水來源過旺濱江臨湖各處驟添盛漲江西湖口城垣坍塌水勢與十一年相平皖省沿江各圩堤尤多漫潰田畝被淹節經各撫臣

奏報八月初旬後天氣已霽柰上游水勢仍復奔騰下注有長無消兼連日東風潮汐益形洶湧

以致江寧鎮江揚州等府屬沿江各縣民田均  
多淹漫幸水由漸至居民遷移高阜搭篷棲止  
其高處山田雖間亦苦雨尙無甚礙可冀有秋  
至淮揚濱湖沿河一帶早中各稻雖已收割晚  
禾正在成熟因豫省亦雨多水發洪湖漲勢日  
增林家西滾壩業已啟放上游則壩水建瓴下  
游則江湖頂托以故運河之水驟難消落現已  
將車邏南關中壩次第拆除雖經飭令添培堤  
堰亦恐不免稍有淹漫徐海各屬低窪地畝均  
因七月底雨水過多間有被淹據各該府州縣

稟請勘辦前來臣查江南連年被災民間蓋藏已竭今復有此水患雖不過沿江沿河沿湖之地係屬偏隅而被淹小民業已秋成失望顛沛堪虞除飭各藩司委員分投查勘設法拯救俟水勢稍退勘明成災分數再行分別會

奏照例辦理至洪湖水勢長至二丈零七寸八月初六七八九日均已報定黃河水勢外南順黃壩長至四丈零六寸日來逐漸消落存水三丈六尺七寸比時天已晴霽湖水已定可冀日消河水亦長少消多惟距霜降尙遙仍嚴飭河廳

各員弁竭力防守毋稍疎怠以保安全謹附片  
縷陳伏乞

聖鑒謹

奏

道光十三年八月十九日附

奏九月二十日奉到

硃批查勘明確據實辦理欽此

奏壽春鎮患病開缺委長副將署理摺子

文撫會稿

奏爲總兵患病一時難以就痊懇

恩准予開缺回籍調理并請

旨簡員補放以重地方事竊

臣

接據壽春鎮總兵湯

占先稟稱由四川行伍出師巴勒布西藏廓爾

喀川陝甘肅黔楚等處軍營得受潮濕左膀時

覺疼痛本年入春以來頓覺沉重騎乘維艱近

又得驚悸之症夜間不能成寐醫云血氣衰敗

一時難以就痊總兵爲專閫大員未敢以病軀

戀棧致有貽誤懇卽

奏請開缺解任回籍調理再圖報効等情 臣查湯  
占先年六十五歲四川人由行伍出師洊陞遊  
擊由部推陞江南鎮江營叅將陞調江寧城守  
營副將蒙

恩補授壽春鎮總兵道光九年八月內到任該鎮久  
歷戎行節次打仗著績卽在壽春鎮任已經四  
年一切營伍操防均能認真整飭茲因軍營得  
受潮濕舉發沉重難以供職懇請解任回籍調  
理自係實在情形合無仰懇

聖恩俯准湯占先解任回籍俾得安心調理所遺壽



春鎮總兵員缺管轄鳳潁等屬界連豫楚最爲緊要臣查有調任江寧城守營副將長喜清廉勤慎操練認真久任安徽熟悉地方情形前曾四次委署壽春鎮總兵辦理妥洽毫無貽誤平時辦理公事均極公允兵情感服且係曾經保舉堪勝總兵之員現卽委令署理壽春鎮總兵印務足期勝任惟員缺緊要相應請

旨迅賜簡員補放以重地方除委員查驗湯占先將來病痊能否起用俟結覆到日另行覈辦外謹會同安徽撫臣兼提督銜鄧廷楨合詞恭摺具

奏伏乞

皇上聖鑒謹

奏

道光十三年八月十九日具

奏九月二十日奉到

硃批另有旨欽此同日奉到九月初五日內閣奉

上諭陶澍奏總兵患病請回籍調理一摺安徽壽春

鎮總兵湯占先著准其開缺回籍調理欽此又奉

到九月初五日內閣奉

上諭安徽壽春鎮總兵員缺著果勒明阿補授欽此

奏揀員陞署泗州營都司摺子

安撫會稿

奏爲陸路都司員缺緊要恭懇

聖恩俯准揀員陞署以裨地方事竊准兵部咨泗州營都司袁夢熊准其陞補潛山營遊擊行令給咨送部引

見等因所遺泗州營都司係陸路題補之缺駐劄盱眙縣地方管轄泗州盱眙天長等州縣並江安兩省交界之洪澤湖各汛境水陸紛歧四通八達且緊接新設內河水師營汛官兵正資策應哨巡緝捕在在悉關緊要必得精明強幹捕務

勤諳之員方足以收實效查上下江歷俸已滿  
三年各陸路守備內或現有親喪事故或例應  
迴避或於是缺人地未宜均未便請陞謹選得  
題請調補青山營守備之提標左營守備王夢  
熊年四十九歲江南上元縣人由行伍洊拔千  
總道光十年題補常州營守備先經委署泰州  
營守備調補提標左營守備十一年六月內受  
劄十二年四月到任本年四月內經臣  
題請調補青山營守備現尙未准部覆該員前於  
署泰州營守備任內節次拏獲梟犯許開勳朱

有發等二十餘名私鹽共五萬餘觔經部題明  
覈與議敘定例相符應准其不論俸滿卽行陞  
用行令出具考語給咨送部引

見該員精能勤幹營務優嫻且於緝捕甚爲得力以  
之請陞泗州營都司洵堪勝任雖抵任未滿三  
年例准陞署臣因人地相需起見合無仰懇

聖恩俯准將王夢熊陞署泗州營都司於地方營務  
均有裨益如蒙

俞允該員係掣獲私梟出力案內應行引

見之員容臣另行給咨併案聲明送部除查取履歷

咨移部科查覈外

臣

謹會同安徽巡撫兼提督

銜臣鄧廷楨合詞繕摺具

奏伏乞

皇上聖鑒訓示謹

奏

道光十三年八月十九日具

奏九月二十日奉到

硃批另有旨欽此同日奉到九月初五日內閣奉

上諭陶澍奏揀員陞署陸路都司一摺著照所請江

南泗州營都司員缺准其以王夢熊陞署該員係

挈獲私梟出力案內應行引見之員著該督給咨  
併案送部引見該部知道欽此

覆奏體察州縣督銷鹽引情形摺子

奏爲遵

旨體察州縣督銷鹽引情形據實覆

奏仰祈

聖鑒事案查道光十三年二月初一日承准軍機處  
字寄奉

上諭據御史徐廣縉奏請嚴飭州縣督銷鹽引一摺  
鹽務銷引之法莫要於緝私私鹽日戢則官鹽自  
暢若如該御史所奏商人認銷口岸多不自經理  
止付之商廝店夥而商廝店夥又止知營私罔卹



商人成本故商日疲而課日絀且兩淮運鹽船戶不獨無水腳可領必須向船行花費始能領運引鹽借有官引肆行夾帶其夾帶之私卽沿途售賣私不銷盡鹽不到岸縱口岸缺鹽地方官屢次稟催而商斷店夥止以在途阻風稟復及運鹽到岸多被船戶攙和沙土成色不堪岸夥照引收艙船內賣剩夾帶私鹽卽爲店夥賤售名曰掃倉其數無從查察是商人行鹽在途則有船戶之夾帶在岸則有店夥之浮收行一鹽之引非三四倍之私不能商店銷售必先將私鹽銷盡始銷官引官引

所以日滯又現在鳳穎一帶有請票行鹽者亦有  
官爲籌運者如州縣能實力奉行卽滯岸不難銷  
售至責令州縣實力督銷之法莫要於商運不前  
者地方官爲之籌款運售岸鹽不銷者地方官爲  
之派數比銷倘商運已足地方官不能實力督催  
卽分別予以降罰叅革如商運不足地方官能籌  
款運售或更能於額外溢銷者卽分別予以記功  
加級州縣自實力奉行至運鹽到岸之日倘有積  
滯請照潁州府比銷之法飭令鄉城地保開具食  
鹽戶名除零星小戶不計外所有鄉城各戶照戶

口派銷如醬坊醃菜坊照市面派銷均由地方官  
體察辦理其督銷造報之法設立冊票一爲地保  
認銷票一爲商店發鹽票地保赴店買鹽時彼此  
對票商店則憑地保認銷之票報銷地方官則憑  
商店發鹽之票報銷其零星小戶赴店自行買食  
者亦併彙入總報報銷得實商店乃不得以銷剩  
私鹽混作未銷官引則州縣督銷得力各等語是  
否可行著陶澍體察情形妥議具奏務期於國課  
民食兩有裨益該御史原摺著鈔給閱看將此諭  
令知之等因欽此

臣伏查兩淮鹽引課額甲於天

下其產二十三場運銷六省水陸數千里其間  
弊竇叢生卽淮南淮北亦各有受敝之由竝非  
一轍如該御史徐廣縉所言各弊尙不及十分  
之一且多係從前未經整頓時事大都得自局  
外傳聞卽如所論私鹽一節專指船戶不領水  
腳爲言是卽臣會同

欽差臣王鼎寶典籌議章程十五條內實給水腳毋  
許商所輩尅扣以免船戶帶私盜賣之一條也  
其實私鹽何止船戶緣山驀澗大夥之梟徒無  
論卽商所商夥莫不帶私而商人亦有包內之

私自臣奏定每包以五百觔出場有整數而無  
奇零既便稽查兼資配割而夾帶之弊始除其  
餘隨時隨地多所剔釐卽以淮南而論竈戶煎  
鹽爲業盤鏹而外無餘產多貸場商以資工本  
及至煎滴成鹽交垣則慮其盤剝以抵欠售私  
則得有現錢而價多是以偷漏時虞煎丁受僱  
於竈戶栖止海灘風雨不蔽烟薰日炙無間暑  
寒其苦百倍於窮黎頭長有稽查之責受商賄  
則助商而勒竈以重觔受竈賄則助竈而坐視  
梟販之透私海濱路雜追捕爲難此在場之弊

也自臣嚴飭場官稽查火伏堵緝出場卡隘如

泰州營挈獲朱有發等案生擒梟匪每起至數十名之多私鹽以十數萬計其餘積滑如沈小寶顧鳳禮等窮追至海隅就獲而場竈透私之弊始清運鹽出場屯船裝載其承攬多係用費爭謀預買竈私兼收零販以爲沿途雜費及日食柴米之需船戶水手窺見其情恣行偷竊以及抬夫扛搬諸多拋撒迨過泰壩經歷江甘各境地棍土匪詐擾分肥名爲黑費甚至勾通銅鉛木簾船隻橫泊江心阻礙訛錢名爲買路及

抵儀徵又有大腳小腳掃二水等名目偷爬肆竊得鹽售梟盤踞水次此其出場至所之弊也  
自臣飭司較準官秤遴委壩員認真掣驗竝委員嚴查沿途匪窩追出私佔地岸約據將匪徒分別重懲枷號河干斷其私費而沿途竊阻之弊始清由壩抵儀改包捆掣埠頭攬頭內帶外帶各項人等層層剝削而場船交卸更換棕船營謀攬載一如屯船私相盜賣江船則專圖夾帶勾通捆工放舫加重謂之買碁且借錢購私謂之跑風以致引少私多鹽務爲之大壞自臣

明定章程革除內外帶頭各埠行用歸商自給  
船戶水腳由監掣衙門當官圓契會同委員逐  
包驗放無從尅扣向來過壩鹽觔逾額而儀柵  
仍屬不敷近則過壩鹽觔如額而儀柵不致短  
缺此實包內無浮之明証至於包外跑風之鹽  
往往買自私梟近因場竈不能透私又儀徵老  
虎涇等處梟巢盡破如蔣四長子等屢逸屢獲  
嚴行懲辦販徒多已解散其餘長江停泊賣私  
之處亦屢經拏辦如銅陵桐城彭澤等案均經  
臣特叅嚴懲而帶私盜賣之弊始清從前鹽船



到岸輪售待價一船未盡後船不敢開艙因而  
暗地盜賣輪未及而鹽已空挪後掩前互相遞  
換謂之過籠蒸糕其挪掩不及者則鑿船沉之  
捏報淹銷謂之放生此皆銷鹽不銷引惟私是  
務之積弊也自臣力主散輪之議隨到隨售無  
須盜賣年來江行遭風者有之艤舟報淹者絕  
無而盜賣鑿船之弊始清此外如裁減浮費稽  
查糧私各務均經稟承

聖誨切實遵行不令稍弛至淮北之弊更甚於淮南  
場不收鹽而暗售匪棍以延殘喘商不運鹽而

轉借蘆私以支門面馴致梟橫成攘奪之風民  
困多淡食之日如船戶攙和泥土店夥賤售掃  
倉猶其弊之小者自臣議改票鹽奉

旨准行而場困獲甦民間食賤秤足而色淨從前諸  
弊一掃而空可不至額銷有滯無煩追比惟淮  
南行銷各岸連值水災且地在江廣鞭長莫及  
非各省地方官同心一氣嚴緝私鹽不能如額  
銷足至於該御史所奏請照潁州府比銷之法  
按戶口派鹽地保與商店各立冊票查對並地  
方官籌款運鹽等語臣愚以爲斷不可行無論

州縣公務較繁不能按戶算鹽且亦無此鉅款  
籌以辦運勢必挪動錢糧虧缺且由此而起況  
一州縣之倉庫錢糧未足供一州縣運鹽之用  
而代商辦運銖銖計利亦於政體非宜至派銷  
比銷之說尤屬難行一州縣戶口動輒十數萬  
計保甲按牌稽覈猶不能窮力搜查錢糧按畝  
徵收尙不能如期完納今乃按戶授鹽責以銷  
售是丁糧奉裁之後又以丁鹽滋擾且舉報全  
憑地保其人豈盡善良或以丁少而報丁多或  
以小戶而報大戶紙張飯食冊費有增價值低

昂浮捏必甚彼窮民細口一飯不飽安能計日  
食鹽若垂爲令甲地方官必因缺銷而比地保  
且因地保掛欠而比花戶夫州縣徵收錢糧不  
得已而敲扑平民若於催科之外加以催銷竊  
恐課未必充而民已重困且民間有土著有流  
寓住無定址醬坊醃菜坊有興廢有起跌店無  
定數或銷售不足或侵食逃亡必至鹽歸無着  
而州縣於倉庫正項之外又添虧空如果潁州  
府此法能行何至久成滯岸哉蓋派數比銷之  
法以視前代貸錢於民春借秋還其敝尤甚實

力奉行則必增擾累虛文搪塞又無補離綱臣  
受

恩深重刻刻以興利除弊爲念然上裕

國課必須俯察輿情實未敢旨昧議行致滋擾累  
謹將遵

旨體察情形據實覆

奏伏乞

皇上聖鑒訓示謹

奏

道光十三年八月二十九日具

奏九月二十七日奉到

硃批依議欽此

奏淮南加帶殘引因水患未能帶銷請停止摺  
子

奏爲淮南加帶已庚殘引因各省連年水患未能  
帶銷佔礙正綱據實

奏請停止仰祈

聖鑒事竊照淮鹺於道光十年經

欽差查辦將已丑綱未運三分及庚寅全綱引鹽

奏明停運俟暢銷後分帶嗣經臣於籌議加觔案

內定以連漚耗每四百觔爲一引仍照舊每包  
五百觔捆運出場解捆正鹽之外以所餘一百

勛作爲加帶已庚停運之引帶完正課錢糧免徵雜課約計五綱可以帶運完竣奏蒙

交部議覆准行在案其時原爲籌補停引希冀帶運帶銷可於一綱而行五季之鹽且加帶之引祇完正課藉可扯輕科則以減價而敵私而包捆仍舊於出場運腳亦有所省旣得彌補舊虧兼寓調劑商情此臣督同運司再三籌畫冀於疏引招徠兩有裨益之苦情也乃自辛卯加帶以來江廣各省連年被水成災民間待餉嗷嗷安能顧及鹽味以致岸銷未能遂旺覈計道光十



一年分湖廣省銷鹽七十一萬三千餘引江西  
省銷鹽十三萬四千餘引道光十二年分湖廣  
省銷鹽七十二萬餘引江西省銷鹽十八萬餘  
引是楚西二省銷鹽之數雖比之往年稍有起  
色而於辛卯壬辰兩綱正額仍未能銷足其餘  
安慶池州太平及各食岸尤多銷不足額則此  
項隨正加帶已庚之引各省口岸未能帶銷轉  
不免佔礙正綱地步現計壬辰未運楚西綱鹽  
尚有七十萬餘引之多而目前江廣各省又值  
大水勢難遽望暢銷自未便仍帶已庚致令僅

完正課之帶引估礙正綱之正雜錢糧使京外  
應解各雜款無以支解實爲頻年水災所累不  
得不亟爲籌策相應據實

奏明自癸巳綱起卽將已庚殘引停止加帶俟壬  
辰綱引運竣後截明已帶引數飭司造冊咨部  
其停止未帶之引仍照

欽差原奏俟察看口岸暢銷後再行酌議帶運所有  
商鹽每包五百觔出場解細正鹽四百觔之外  
其餘一百觔循照割引成例配割本綱正引按  
照科則正雜錢糧全數完納至淮北已改行票

鹽按年儘實運之數扣足正綱外其溢運之引  
仍作已庚帶引銷算合併聲明爲此恭摺具  
奏伏乞

皇上聖鑒訓示遵行謹

奏

道光十三年八月二十九日具

奏九月二十七日奉到

硃批戶部議奏欽此

道光十三年十一月初六日接准戶部咨送覆  
奏摺稿內稱臣等查兩淮從前鹽引滯銷由於商  
人成本過重賣價增昂以致私販盛行銷路未  
能暢旺自道光十年酌減科則成本已輕及十  
一年議定每引加鹽一百觔令其僅完正課覈  
計所完之數每引不過三錢有零在商人可以  
扯輕科則減價敵私而包捆仍舊於運腳亦有  
節省且以加觔之課彌補舊虧計辛卯加觔以  
來每綱帶徵銀五十餘萬兩於課項亦不無裨  
益今該督以江廣連年被水岸銷未旺請自癸

已綱起停止加帶已庚引課其每引餘鹽一百  
觔另行配割正引按正雜錢糧全數完納係爲  
加帶課引恐致估擬正綱起見惟查兩淮額引  
一百六十九萬二千四百九十二道每引應徵  
正雜錢糧四兩有零外帶已庚一百觔徵銀三  
錢有零以四百觔爲一引覈算僅交銀一兩二  
錢有零倘循例配割正引共成引四十餘萬道  
正雜錢糧併計每四百觔卽須交課四兩有零  
共應交銀一百七十八萬兩較帶徵之課幾至  
三倍商人科則加重必致轉運不前且淮鹽逾

額捆運積弊該督前於奏請加劬案內業已縷  
晰陳明今仍以五百劬出場而欲以四百劬配  
引勢必暗中夾帶名爲另行割運實則照舊捆  
包而已庚之加帶旣停課款卽歸無著是每綱  
徒增四十餘萬引無課之鹽轉少五十餘萬兩  
帶徵之課殊非覈實之道查本年淮南秋撥冊  
報除動支各款外計存庫候撥銀一百餘萬兩  
若非分年加帶已庚則存庫銀兩亦屬無幾至  
楚西兩岸雖經連年被水未能運銷足額而辛  
卯壬辰兩綱奏銷實共報完銀四五百萬兩較

之庚寅以前究有起色此後兩陽時若自更日見暢銷現在癸巳開綱該督正當嚴飭商人趕緊摺運所有加帶已庚引課應仍令該督詳加體察情形如果停止加帶另配正引實能較現完引課有盈無絀且能力杜奸商夾帶不致自弛防維方爲確有把握不得因江廣偶值偏災遂以鹽多壅滯爲詞遽將甫經奏定章程又思更變致滋弊混等因道光十三年十月初八日具

奏本日奉

旨依議欽此



議鹽務銷引緝私官員分別勸懲摺片

再准鹺課額最多引地極遠轉運之責操自運  
司疏銷之實全在各省二者相因爲用而疏銷  
尤爲緊要蓋銷數暢則商力舒而轉運自速銷  
數滯則商本攔而轉運不繼故督銷二字獨關  
鹽務考成未有銷數不旺而商情踴躍辦運迅  
速者也然使地方官緝私不力而專以銷數責  
商勢必敦催搶跌利歸國販而商本益虧又或  
緝私而但防包內之私不防境外之私紛紜擾  
累勢必買靜圖安暗添規費而商力愈徵斯皆

因未傷本有礙運務由於嚴督銷而不嚴緝私  
之所致也伏讀

諭旨鹽務銷引莫要於緝私私鹽日緝則官引自銷  
煌哉

天語仰見

聖明洞照無遺鹽務之全局悉賅諸此矣夫淮綱居  
各省腹心之中是以隣私最多在湖廣有川私  
粵私潞私蘆私江西有粵私閩私浙私安徽亦  
有閩私浙私蘆私四面侵入官引大半爲其所  
佔年來惟蘆私稍爲斂迹係因改行票鹽之故

其餘銷數雖已較前有增係因糧船回空堵緝嚴密無私鹽夾帶故岸銷有增而實祇足抵糧船夾帶之數則隣私之未能堵截已可概見查各岸督銷考成湖廣江西與江南之安池太等府及寧國上江等食岸情形不同安池太及寧國上江等食岸係各商逕自運銷故按各州縣額銷考覈計叅湖廣之鹽係運貯漢口江西之鹽係運貯省城均由水販轉運分往各州縣銷售故例係融銷按年專計鹽道考成前此嘉慶十九年曾經前督臣百齡前鹽臣阿克當阿將

楚西二省銷鹽

奏請照安池太等處之例改爲州縣額銷嗣以窳  
礙難行復於嘉慶二十三年經前督臣孫玉庭  
會同阿克當阿

奏准仍照舊例融銷其有私鹽充斥地方文武查  
拏不力仍嚴行叅劾等因在案至安池太及寧  
國上江等處各食岸從前缺銷責令州縣賠課  
有名無實於乾隆五十八年停止而嚴定督銷  
處分凡銷引欠一分者停其陞轉欠二分者降  
俸一級欠三分者降俸二級俱戴罪督銷欠四

分以上者降二級調用五分以上者降三級調用六分以上者降四級調用七分以上者卽行革職是兩淮缺銷處分已較他省爲重無如地方州縣以按年考覈之處分漫不經心且恃有分年補銷之例可以開復遂致相率膜視查各省州縣有獲盜送部引

見者矣從未聞各省州縣有挈獲大夥私梟請獎者則考覈徒成具文更可知茲蒙

皇上發下御史徐廣縉條奏請嚴飭州縣督銷鹽引臣查該御史原摺本言責成州縣緝私顧其責

成之法惟以按戶派銷付之地保而轉置州縣  
緝私於不問臣愚以爲督銷之法捨緝私無捷  
策外此惟減價敵私最爲良法美意顧鹽價雖  
減商本不能不顧是必銷路通暢商力實在有  
餘而後可仍須以緝私爲銷路之導而責成州  
縣併當責成本管之道府嚴查考覈方於督銷  
有益至州縣之弊首在因循必須隨時勸懲加  
以振作應請

旨申明淮鹽督銷除按年照例考覈外各州縣如有  
玩視鹽法於堵卡設監緝私疏引各務漫不畱

心任聽缺銷者由該管道府立時揭叅分別摘頂撤任俟梟犯全獲鹽引補銷全完再行酌請開復否則卽予降革道府狗庇不揭者一併叅處其有督銷認真者隨時記功擢用如能連年引銷全額或竟溢銷者照州縣錢糧三載全完之例請

獎以資鼓勵而振積疲臣於湖廣既係隔省江西雖臣所屬相距較遠竝懇

聖恩勅下湖廣江西各督撫一體通飭於循例融銷考覈外竝卽由該管道府嚴查各州縣銷鹽引

數如有坐縱隣私任聽墮誤亦卽隨時揭叅撤  
任辦理分別勸懲俾資整頓庶幾堵緝加嚴疏  
路日暢於運務可期大有起色矣謹將遵

旨妥議緣由縷晰附陳伏乞

聖鑒訓示謹

奏

道光十三年八月二十九日具

奏九月二十七日奉到

硃批該部議奏欽此



道光十三年十二月十二日接准戶部咨送覆  
奏摺稿內稱臣等查兩淮鹽行六省引地遼濶錯  
出於粵閩蘆潞之間其督銷課額爲最繁其堵  
緝鄰私亦最不易嘉慶十九年因楚西二省綱  
鹽口岸向係融銷各州縣恃無缺銷處分以致  
緝私不力經前督臣百齡等奏請援照淮南安  
池太綱食口岸之例定爲州縣額銷嗣因窒礙  
難行於嘉慶二十三年復經前督臣孫玉庭等  
奏准照舊融銷其有私鹽充斥地方文武查拏  
不力仍按定例嚴叅等因各在案茲據兩江總

督陶澍奏稱督銷考成楚西與江南綱食口岸情形不同江南係各商逕自運銷故按州縣額銷考覈楚西係水販轉運故例係融銷專計鹽道考成然鄰私未能堵截則考覈徒成具文仍須以緝私爲銷路之導竝請飭湖廣江西各督撫一體整頓等語查前於道光十年因兩淮鹽政無管轄地方之責文武員弁非其所屬難期令行禁止往往墮課縱私欽奉

諭旨將鹽政改歸兩江總督管理數年以來銷數較前有增私販亦稍爲斂跡巡緝疏銷自可日有

起色惟引地旣廣控制難周卽如江西湖廣各  
鹽道督銷功過雖歸該督考覈而江西相距較  
遠湖廣竝屬隔省緝私難於得力自係實在情  
形非明示勸懲不足以資整飭應如該督所奏  
除督銷分數仍照舊分別融銷額銷按年考覈  
外其緝私不力之員應由該督隨時嚴叅示懲  
竝請

飭下湖廣江西各督撫一體責成州縣竝責成本管  
之道府實力奉行以督銷之暢滯驗緝私之勤  
惰如有玩視卡隘任聽缺銷者吏部查江西湖

廣缺銷處分定例本有議處專條歷經遵照辦理在案至分別摘頂撤任應由該督撫自行辦理其有連年引銷全額或竟溢銷者例內亦本有照地丁錢糧例議敘明文歷經遵照辦理在案毋庸再議至疏銷之責固在州縣而巡緝之責尤在營汛若專嚴州縣考成而不及營汛亦難保無縱庇賣放情事應竝按各州縣缺銷溢銷分數將各卡隘巡緝弁兵一竝開送職名咨部照例覈議如此明定章程庶於銷引戢私均有裨益等因道光十三年十一月初七日具

奏本日奉

旨依議欽此